



## KENYATAAN MEDIA

### PENGUATKUASAAN AKTA ANTIPEMERDAGANGAN ORANG DAN ANTIPENYELUDUPAN MIGRAN (PINDAAN) 2022 [AKTA A1644]

---

Akta Antipemerdagangan Orang dan Antipenyeludupan Migran 2007 merupakan instrumen perundangan utama negara dalam mendepani isu perhambaan zaman moden sekaligus membanteras jenayah pemerdagangan orang dan penyeludupan migran di Malaysia. Dalam usaha untuk meningkatkan keberkesanan tindakan menangani kedua-dua jenayah yang dinyatakan, pindaan kepada akta ini telah dilaksanakan bagi memperkasakan peruntukan-peruntukan berkaitan.

Akta Antipemerdagangan Orang dan Antipenyeludupan Migran (Pindaan) 2022 [Akta A1644] telah mendapat perkenan Diraja pada 19 Januari 2022 dan dimasukkan dalam Warta pada 25 Januari 2022. Sehubungan itu, Kementerian Dalam Negeri telah menetapkan tarikh permulaan kuatkuasa Akta A1644 ini pada 22 Februari 2022.

Secara keseluruhannya, terdapat 17 peruntukan dipinda dengan penambahbaikan yang melibatkan pindaan bagi perkara-perkara yang berikut:

- (a) Pindaan kepada tafsiran pemerdagangan orang dan pemansuhan tafsiran paksaan (*coercion*);
- (b) Peningkatan hukuman penjara dan pengenaan hukuman sebatan;

- (c) Peruntukan kesalahan yang lebih berat termasuk melibatkan penjawat awam;
- (d) Pewujudan kuasa Menteri dalam pelantikan mana-mana pegawai awam sebagai penguatkuasa di bawah Akta 670;
- (e) Penambahan keanggotaan organisasi lain dan badan bukan Kerajaan (NGO) dalam Majlis Antipemerdagangan Orang dan Antipenyeludupan Migran (MAPO); dan
- (f) Peluasan peranan Kementerian Pembangunan Wanita, Keluarga dan Masyarakat (KPWKM) dalam pengurusan dan kawalan pegawai pelindung serta rumah perlindungan mangsa pemerdagangan orang.

Akta A1644 ini diharapkan mampu memberi solusi terbaik dalam menzahirkan usaha Malaysia dalam menangani jenayah pemerdagangan orang dan penyeludupan migran dengan lebih efektif. Pendekatan menyeluruh Kerajaan (*whole-of-government*) dan pendekatan menyeluruh masyarakat (*whole-of-society*) yang digunakan diyakini boleh menambah baik kedudukan Malaysia dalam sebarang penilaian antarabangsa sekaligus meningkatkan imej Malaysia di mata masyarakat dunia.

Seluruh lapisan masyarakat adalah diseru untuk bersama-sama berganding bahu dengan pihak Kerajaan bagi membanteras jenayah ini dengan melaporkan sebarang maklumat melalui Chatbot di laman Facebook Majlis Antipemerdagangan Orang dan Antipenyeludupan Migran, e-mel [mapo\\_tip@moha.gov.my](mailto:mapo_tip@moha.gov.my) dan talian 03-8000 8000.

**DATO' SERI HAMZAH BIN ZAINUDIN**  
**Menteri Dalam Negeri**  
**21 Februari 2022**